

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA ÑÁYIU ÑUÚ TESÀLÓNICÁ

Té Pāblú ndihi cue tée cūndihi-dé cadūha-güedé tutú quihĪⁿ ndaha ñáyiū xīndecu ichi Xítoho Jesucristú ndécú ñuú Tesàlónicá

1 ¹Yúhú té Pāblú cadūha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiū ndècu ndihi-ndí ichi Xítoho Jesucristú ndécú ñuú Tesàlónicá, chi cū iⁿnuu-ndo ndihi Tátá-ó Dütú Ndiöxí, ndihi Xítoho Jesucristú. Te xìcáⁿ táhù-í núú Dütú Ndiöxí, ndihi núú Xítoho Jesucristú sá ïo na chīndee chitúū ñaha-gă xii-ndo, te ducaⁿ ndī nduú-gá ná càda te ío váha cuu iní-ndó cūndecu-ndo.

Ñáyiū ñuú Tesàlónicá ío váha sàndáá iní-yu Yá Ndiöxí

²Te ndi tnahá òré càháⁿ ndihi-ndí Yă Ndiöxí ndàcáⁿ táhú-ndĭ núú-gă sá ïo quide váha-ndo ndècu-ndo, te ducaⁿ xìcáⁿ táhú-ndĭ núú-gă sá ná còto ñaha-gă xii-ndo. ³Te ío ndàcáⁿ táhú-ndĭ núú Tátá-ó Dütú Ndiöxí sá ñi yuhu ñi iní-ndó sàndáá iní-ndó-gă, te xīnu cuechi-ndo núú-gă, te cū iní tnahá-ndó nàcuáa ndècu-ndo ichi-gá ñū xīăⁿ ío xito tnahá-ndo. Te cūtnuní ndáá iní-ndó să quixí tūcu Xítoho Jesucristú ñū xīăⁿ ñá túú dàña ndeé-ndó ndètu-ndo-gá. ⁴Te nchòhó ñáyiū ndècu ndihi-ndí ichi Xítoho Jesucristú sa ñaha-ndí sá Yă Ndiöxí ío cū iní ñáhá-gă xii-ndo, te diu-gá ní cáháⁿ ñáhá-gă xii-ndo cuendá cūndecu-ndo ìchi-gá. ⁵Te cūtnàhá ní dánèhé ñáhá-ndĭ xii-ndo tñūhu-gá, chi ñá díú să cúú ìní mée-ndĭ ducaⁿ ñi dànèhé ñáhá-ndĭ xii-ndo, chi mee Espiritú Yă Ndiöxí ní chindee ñaha-xi ní cáháⁿ-ndí ñi yūhu ñi iní-ndí tñūhu-gá núú-ndó. Te ñaha-ndo sá cūtnàhá ní xīndecu ndihi ñaha-ndĭ xii-ndo ñi quide-ndí nàcuáa càháⁿ Yă Ndiöxí cuendá sá cúú-xí să vāha sá cúú-xí-ndó.

⁶Te nchòhó nchìcúⁿ nihnu-ndo quide-ndo vitna datná quidé-ndĭ, chi quide váha-ndo dàtná quidé mēe Xítoho Jesucristú, te díú ìní ní tñi-ndo ìchi-gá cuēi ní ndoho ní tnahá-ndó, chi mee Espiritú-gá ní chindee ñaha-xi xii-ndo. ⁷Te sá dúcáⁿ quide váha-ndo ñuú Yă Ndiöxí, xīăⁿ yīnchìcúⁿ nihnu ñáyiū distrítú Macèdoniá, ndihi ñáyiū distrítú Acăyá xīquide váha-yu tñàhá-yu, ñáyiū xīndecu ichi-gá. ⁸Te diu-ndo ñi sanu ichi-ndo ñáyiū

distritú Macèdoniá, ndihi ñáyiú distritú Acáyá, te ñá díú-ní ñáyiú nchaa ñuú-áⁿ chi nchaa ñáyiú dava-gá ñuú ñihí-yu tnúhu sá ïo sàndáá iní-ndó Yă Ndiöxí. Te ñá túú-gă ná tnúhu cáháⁿ-ndí cuendá-ndó, chi nchaá-yu sa ñihí-yu tnúhu sá ïo váha quide-ndo ndecu-ndo. ⁹Te mée-yu xicáháⁿ váha-yu cuendá-ndó sã ïo váha ní queheⁿ cuendá ñáhá-ndó xii-ndí cútnàhá ní quixi-ndí díhna nuu. Te ní dáñá-ndó nchaa sá càchí-ndó cùu ndiöxí-ndó chi ñá díú ndiöxí cúú-xí, te ní tñi-ndo ìchi Yá Ndiöxí Yaá ndécú tũu andiu chi ñuú-gá cúú-gă Ndiöxí ndisa, te xinu cuechi-ndo núú-gă vitna, ¹⁰te ndètu-ndo quixi tucu Xítohó Jesucristú Déhe Yá Ndiöxí Yaá ndécú àndiu, chi ñuú-ni-gá ní quixi-gá ñuyíú-a ní xihí-gá, te ní ndoto-gá ní dándótó ñaha Yá Ndiöxí xii-gá. Te ñuú-ni Xítohó Jesucristú dácăcu nihnu ñaha-gă xii-o núú ùhú núú ndàhú, chi sàndáá iní-ó-gă.

Nàcuáa ndùu chiuⁿ ní quide té Păblú ñuú Tesalónica

2 ¹Te nchòhó ñáyiú ndècu ndihi-ndí ichi Xítohó Jesucristú ñaha-ndo sá ñà díú àúⁿ nă cuu ni quixi coto ñaha-ndí xii-ndo, chi ní sàndáá iní-ndó tnúhu Yá Ndiöxí. ²Te ñaha-ndo sá cùtnàhá ní xindecu-ndí ñuú Fìlipú ío ní xúhuⁿ tnúhu cuèhé tnúhu duha núú-ndí, te ní caniha-güedě xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnúhu Yá Ndiöxí núú-ndó, chi mee-gă ní chindee ñaha-gá xii-ndí cuèi ío chitu ñáyiú ní cuu úhú iní ñáhá xii-ndí. ³Te ñá túú ní dándahú ñáhá-ndí xii-ndo chi mee-ni tnúhu ndáá ní cáháⁿ-ndí núú-ndó, te ni ñà túú nì ñiⁿ tnúhu cuèhé ñúhú iní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí. ⁴Te mee Yă Ndiöxí ní cachí-gá sá càháⁿ-ndí tnúhu-gá, te càháⁿ-ndí nàcuáa cùu iní mée-gă, chi sa ñaha-gá nàcuáa càa iní-ndí, te ñá túú càháⁿ-ndí nàcuáa cùu iní ñáyiú. ⁵Te ñaha-ndo sá ñà díú ñiⁿ tnúhu cudíí iní-ndó cùndecu-ndo ichi ñuyíú ní cãháⁿ-ndí núú-ndó cuendá taxi-ndo díhúⁿ. Te Yá Ndiöxí sa ñaha-gá sá càháⁿ ndáá-ndí. ⁶Te ñá íiⁿ ndùu ni quide-ndí ñiⁿ sá cádá-ndí cuendá-ni sá cádá cãhnu ñaha-ndo xii-ndí, àdi cada cãhnu ñaha dava-gá ñáyiú, te cuèi tàú ndisa-ndí sá cádá cãhnu ñaha-ndo xii-ndí ní cùu, chi chiuⁿ Xítohó Jesucristú quidé-ndí, te dícó-ni sá nchùhú ñá túú ní cuini-ndí sá dúcáⁿ càda-ndo. ⁷Te ío vii ío váha ní cáháⁿ-ndí núú-ndó, dàtná quidé ñiⁿ ñaha cuu náná vii vii càháⁿ ndihi cue déhe-aⁿ dácuehnu ñaha-aⁿ xii-güexi. ⁸Te ducaⁿ ïo cùu iní ñáhá-ndí xii-ndo, dico ñá díú-ní sã ñi cáháⁿ-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñaha-xi, te núú dícó ní cùu-xi sá cúú, cuendá sá ïo cùu iní ñáhá-ndí xii-ndo. ⁹Te nchòhó ñáyiú ndècu ndihi-ndí ichi Xítohó Jesucristú ñaha-ndo sá ïo ní quide chiuⁿ-ndí cuendá ní ñihí-ndí sá ñi xexi-ndí. Te cuèi nduu cuèi niú ní quide chiuⁿ-ndí ní ñihí-ndí sá ñi xexi-ndí

1 TESALONICENSES 2

ní cáháⁿ-ndí tnúhu Yá Ndiöxí núú-ndó cuèndá sá ñà túú ní cuíní-ndí chichìuⁿ ñaha-ndí xii-ndo.

10Te nchòhó ñáyiú sàndáá iní tnúhu Yá Ndiöxí xìní ndáá-ndó sá cúú-ndí cue téé váha te ducaⁿ sà naha Yá Ndiöxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te diu-ni ducaⁿ quide-ndí vitna. Te vá yõ ìⁿ càháⁿ sá ñà túú quide ndáá-ndí ndécú-ndí. **11**Te nàha tucu-ndo sá ñí dácàháⁿ ñáhá-ndí xii-ndo, te ní taxi-ndí tnúhu ndee ìní xii-ndo nchàa-ndo, te dàtná quidé ìⁿ tátá ndihi cue déhe-dé ní quide-ndí. **12**Te ní cachí-ndí xii-ndo sá cádá ndáá-ndó cùndecu-ndo nacúaá tàú-xi cada nchaa ñáyiú tnàhá tnúhu ndihi Yá Ndiöxí, chi mee-gã ní cáháⁿ ñáhá-gã xii-o cuèndá nduu táhú-ó cùndecu-o ndihi-gá núú ìo váha càa ndecu-gá táxí tnùní-gá.

13Te xíãⁿ ío ndàcáⁿ táhú-ndí núú Yá Ndiöxí sá nchòhó òré ní tedóho-ndo tnúhu-gá ní cáháⁿ-ndí, te ní sàndáá iní-ndó chi ní cutnùní iní-ndó sá díú tnúhu Yá Ndiöxí cúú-xí, te ñá díú tnúhu ñáyiú ñuyíú-a cùu-xi. Te ndáá sá cúú-xí ìⁿ sá ìo váha sá cúú-xí nchòo cue ñáyiú ní sàndáá iní tnúhu-gá. **14**Te nchòhó ñáyiú ndècu ndihi-í ichi Xítóhó Jesucrìstú, ío ní ndoho ní tnahá-ndó sá ñí quide ñaha ñáyiú ñuú-ndó. Te nchòhó ní ndoho-ndo dàtná ní ndoho nchaa ñáyiú tàcá dácuaàha tnúhu Xítóhó Jesucrìstú ndécú dìstrítú Jùdeá, chi tnàhá-yu ío ní dándóhó ñàha ñáyiú ñuú-yu. **15**Te diu-ni ñáyiú dìstrítú Jùdeá-áⁿ ñí sahní-yu cue téé ní xóo cáháⁿ tnúhu Yá Ndiöxí ndéé sanaha. Te diu-ni ñaní tnáhã-yu cùu cue ñáyiú ní sahní ñaha xii Xítóhó Jesucrìstú, te sátá xíãⁿ te ní ngúíta-yu ní cuu úhú iní ñáhã-yu xii-ndí, núu xíãⁿ ñá túú tnàhá iní Yá Ndiöxí nchaa sá quidè-yu, te ndéé nchaa dava-gá ñaní tnáhã-yu cùu úhú iní-yu. **16**Te ío chidácá nihnu ñàhá-yu xii-ndí òré càháⁿ-ndí tnúhu Yá Ndiöxí núú ñáyiú ñá túú cùu ñáyiú isràél, te ducaⁿ quide ñáyiú-áⁿ cuèndá cuíní-yu sá vã càháⁿ-ndí tnúhu-gá, sá cádá cuèndá naníhí tàhú ñáyiú ñá túú cùu ñáyiú isràél-áⁿ, te sá dúcáⁿ quidé-yu te ío ta cùu vai-gá cuéchi-yu cuáháⁿ. Te Yá Ndiöxí ío cùdèéⁿ-gã núú-yu, te tendaha-gã ìⁿ tnúndòho quixi sá cúú-xí-yu te ío ndohó-yu.

Té Pàblú cuíní-dé quíngoto-dé ñáyiú xíndecu ichi Xítóhó Jesucrìstú ndécú ñúú Tesalónica

17Te nchòhó ñáyiú ndècu ndihi-ndí ichi Xítóhó Jesucrìstú ní quee-ndí núú-ndó, te cuèi ní cuxica-ndí dico ducaⁿ-ni ñùhu iní ñáhá-ndí xii-ndo, te ío ñùhu iní-ndí sá quíxí còto ñaha tucu-ndí xii-ndo. **18**Te yúhú té Pàblú ducaⁿ-ni ñùhu iní-í sá cuèdicó mèè-í quixi-í, quixi coto ñaha-í xii-ndo, dico yucu ñávãha chidácá nihnu ñaha-xi xii-í. **19**Te nchoo ñáyiú ndècu ichi Xítóhó Jesucrìstú ndètu-ni-gá-ó quèxio-gá candeca ñaha-gã xii-o ndàa andiu cundecu-o ndihi-gá. Te cùdíí víhí iní-ndí sá cuèndá-gá chi ní chindee ñàha-gá ní sanu ichi ñaha-ndí xii-ndo ìchi-gá, te ío vai ñáyiú cáháⁿ váha-yu

cuendá-ndí ná sàá nduu quìxi tucu-gá. ²⁰Te ducaⁿ ìo vài ñáyiu cáháⁿ váha-yu cuendá-ndí cuendá sá ñí sanu ichi ñaha-ndí xii-ndo ìchi-gá, te quide váha-ndo. Te xíáⁿ ío cùdíí ìní-ndí.

3 ¹⁻²Te sa ní cunduu ñá túú-gă cãháⁿ ndihì tnàha-o, núu xíáⁿ ñá ní cùndee-gá ìní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñúú Àtenás, chi tnàhá-dé xínú cuèchi-dé núú Yă Ndiöxí, ndihì núú Xítóhó Jesucrìstú cãháⁿ-dé tnúhu-gá núú ñáyiu. Te ní quixi-dé ní taxi-dé tnúhu ndee ìní xii-ndo cuendá sá ìo quindáá-ni ìní-ndó Xítóhó Jesucrìstú, te canchicúⁿ nihnu-ni-ndo ñè yuhu ni ìní-ndó ìchi-gá. ³Te vá nátùhú ìní-ndó cànchicúⁿ nihnu-ndo ìchi-gá sá dúhá cùu úhú ìní ñáhá ñáyiu xii-o, te nchòhó sa nàha-ndo sá dàcuitíí sã ndóhó vèhi-o cuendá-gá. ⁴Te ndéé cútnàhá ndécú ndihì ñaha-gá-ndí xii-ndo ñí cachí tnúhu ndáá-ndí sá ìo ndoho-o, te ducaⁿ ndisa quide-xi. ⁵Te xíáⁿ núu ñá ní cùu váha-gá ìní-í chi cuendá ñá túú-gă ní ñhì-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núú-ndó núu ndècu-ni-ndo ichi Xítóhó Jesucrìstú, chi ní sani ìíⁿ ní sani úú ìní-í sá cúú-xí-ndó, chi ná ndéé chidácá nihnu ñaha yùcu ñávàha xii-ndo te cuíta chiùⁿ ní quide-ndí sá cúú-xí-ndó ñí cáháⁿ-í.

⁶Te ñáhá, chi ní ndexìo té Timùteú sá ñí quixi-dé ñúú-ndó, te nàha-dé tnúhu ní nasáá sá ñè yuhu ni ìní-ni-ndo sàndáá ìní-ndó Yă Ndiöxí, te cùu ìní-ndó cuè tnaha ñáyiu-ndo. Te cãchí-dé sá ìo ñùhu ìní ñáhá-ndó xii-ndí, te ío cuìní-ndó cãháⁿ ndihì ñaha-ndo, te ñiu-ni ducaⁿ ìo cuìní nchúhú cáháⁿ ndihì ñaha-ndí xii-ndo tùcu. ⁷Te ío ndòho-ndí chi ío cùu úhú ìní ñáhá ñáyiu xii-ndí, dico sá ñí ñhì-ndí tnúhu sá nchòhó ñáyiu ndècu ndihì-ndí ichi Xítóhó Jesucrìstú ñá túú dàña ndéé-ndó sàndáá ìní-ndó Yă Ndiöxí, te xíáⁿ cúú-xí ìíⁿ tnúhu cãhnu ìní ní ñhì-ndí chi ní naníhí ndéé-ndí. ⁸Te ní nduu vétú ìní-ndí sá ñí ñhì-ndí tnúhu ndècu-ni-ndo ichi-gá. ⁹Te òré cãháⁿ ndihì-ndí Yă Ndiöxí, te ío ndàcáⁿ táhú-ndí núú-gă cuendá sá ñà túú dàña nihnu-ndo ichi-gá, núu xíáⁿ ío cùdíí ìní-ndí. ¹⁰Te cuèi nduu cuèi níú xicáⁿ táhú-ndí núú Yă Ndiöxí sá méé-gă ná càda te sáá ìíⁿ nduu nàníhí tnáhá-ó cuendá danèhé ñáhá vãha-gá-ndí tnúhu-gá sá cúmãní-gă xii-ndo.

¹¹Te mee Tătá-ó Dütú Ndiöxí, ndihì Xítóhó Jesucrìstú chindee ñaha-gá xii-ndí te quixi-ndí quixi coto ñaha-ndí xii-ndo. ¹²Te mee Xítóhó Jesucrìstú ná chindee ñaha-gá xii-ndo, te ío-gá cuita cuu ìní tnáhá-gă-ndó nàcuáa ndècu-ndo ichi-gá ndihì nchaa dava-gá ñáyiu dàtná cúú ìní ñáhá-ndí xii-ndo. ¹³Te xicáⁿ táhú tùcu-ndí núú Tătá-ó Dütú Ndiöxí sá ñè yuhu ni ìní-ndó cànchicúⁿ nihnu-ni-ndo ìchi-gá, te ducaⁿ te cundáá-ndó núú-gă, te ñá túú-gă ná cumání-ndó òré ná sàá nduu quìxi tucu Xítóhó Jesucrìstú ndihì nchaa ñáyiu sa ndècu ndihì-gá.

Nàcuáa cuiní Yă Ndiöxí cada-o

4 ¹Te nchòhó ñáyiú ndècu ndìhi-í ichi Xítóhó Jesucrìstú càháⁿ ndàhú-í nùú-ndó sã cùndèdóho-ndo na càháⁿ-í nàcuáa ndùu tnúhu càháⁿ Xítóhó Jesucrìstú, chi mee-gă cuiní-gá sá cáda-ndó nàcuáa ní dánèhé ñáhá-ndĩ xii-ndo cuendá cuu váha iní Yă Ndiöxí nùú-ndó, te ducaⁿ-ni càda-ndo ndéé nùú cuàháⁿ nùú vëxi.

²Te nchòhó sa nàha-ndo nacuáa ní cáháⁿ-ndí nùú-ndó, chi ní cáháⁿ-ndí nàcuáa ní táuchíúⁿ Xítóhó Jesucrìstú te ní cachí-gá sá ³Yă Ndiöxí cuiní-gá sá cáda ndăá-ó cùndecu-o ichi-gá. Te nchoo cuè téé vá càháⁿ ndìhi-o ñáyiú dîhí te nùú ñá díú ñàdîhí-ó cùú-yu, te ni cuè ñáyiú dîhí vá càháⁿ ndìhi-yu téé nùú ñá díú yî-yu cùu-güedé. ⁴Te nùú xîăⁿ nchaa nchòhó tnàha téé-í ndi dííⁿ cùndecu ñadîhí-ndó, te diu-ni ducaⁿ nchòhó cue ñáyiú dîhí tucu ndi dííⁿ cùndecu yîi-ndo, te mee-ni tnúhu yîñùhu càháⁿ ndìhi tnàha-ndo. ⁵Te vá cání cuèhé cani duha iní-ndó dàtná quidé cuè ñáyiú ñá túú sàndáá iní tnúhu Yă Ndiöxí. ⁶Te ni ìiⁿ-ndo vá cání ìní-ndó dândahú-ndó tnàha téé-ndo cãháⁿ ndìhi-ndo ñàdîhí-güedé. Te ducaⁿ-ni nchòhó cue ñáyiú dîhí tucu vá cání ìní-ndó dândahú-ndó tnàha dîhí-ndó cãháⁿ ndìhi-ndo yîi-yu. Chi nùú ducaⁿ na càda-ndo, te Yă Ndiöxí ío dandòho ñaha-gá xii-ndo dàtná ní cachí-ndí ndéé díhna. ⁷Chi Yă Ndiöxí ní cáháⁿ ñáhá-gă xii-o cuendá sá cáda-ó mèe-ni sá vâha, te ñá díú sã cuèhé sá dúhá. ⁸Te nchaa ñáyiú na càda sáá iní-xi tnúhu càháⁿ-ndí, te quide sáá iní-yu nùú Yă Ndiöxí, chi ñá díú tnúhu téé ñuyíú-a cùu-xi, chi tnúhu Yă Ndiöxí, Yaá ní taxi Espíritú-gá ndécú ndìhi-o cuu-xi.

⁹Te nchòhó ñáyiú ndècu ndìhi-í ichi Xítóhó Jesucrìstú, ñá túú-gă xíní ñùhu-xi cachí tnúhu-í xii-ndo sã cúú ìní tnáhá-ndó, chi Yă Ndiöxí sa ní dánèhé ñáhá-gă xii-ndo nàcuáa cuu iní tnáhá-ndó, ndìhi nàcuáa cuu iní-ndó dàva-gá tnàha ñáyiú-ndo. ¹⁰Te ducaⁿ xîquide-ndo ndìhi nchaa ñáyiú ndècu ndìhi-ndo ichi Xítóhó Jesucrìstú ndécú dîstrítú Macèdoniá. Te càháⁿ ndàhú-ndí nùú-ndó sã cáda ndăá-gá-ndó, te cuita cuu iní-gá-ndó cuè tnaha ñáyiú-ndo quîhíⁿ. ¹¹Te cada ndee ìní-ndó cùndecu ñucaxi iní-ndó, te cuhuⁿ iní-ndó chiúⁿ mee-ndo, te xîăⁿ cada-ndo dàtná ní dánèhé ñáhá-ndĩ xii-ndo. ¹²Te ducaⁿ te tnàhá nchaa ñáyiú ñá túú sàndáá iní tnúhu Yă Ndiöxí cáháⁿ váha-yu cuendá-ndó, te ducaⁿ te ñá túú tnàhí-gá ná cùmání xii-ndo.

Nàcuáa cada-xi òré quixi tucu Xítóhó Jesucrìstú

¹³Te vitna na càchí tnúhu-ndí xii nchòhó ñáyiú ndècu ndìhi-ndí ichi Xítóhó Jesucrìstú cuendá nchaa ñáyiú sa ní xîhí, ñáyiú ní sàndáá iní tnúhu Yă Ndiöxí cuendá sá vă ndìhú iní-ndó cuendá-yu dàtná xîquide nchaa

ñáyiú ñá túú yìhi iní-xi sá quíxí tùcu Xítohó Jesucristú ñuyíú-a. ¹⁴Te nchoo sàndáá iní-ó sã ñí xíhí Xítohó Jesucristú te ní ndoto-gá ní dándótó ñàha Yá Ndiöxí, te sàndáá tucu iní-ó sã dàtná ní dándótó Yá Ndiöxí Xítohó Jesucristú, ducaⁿ dándoto-gá nchaa ñáyiú ní xíhí ñáyiú ní sàndáá iní ñáhá xii-gá.

¹⁵Te na càchí tnúhu tucu-ndí ingá tnúhu nàcuáa ní cáháⁿ Xítohó Jesucristú, chi ní cachí-gá sá ná sàá nduu quixi tucu-gá te nchaa ñáyiú sàndáá iní tnúhu-gá ndécú vívú ñuyíú-a vá códó nùú-yu núú ñáyiú ní xíhí ndaa andiu, chi jùndú candeca ñaha-gã xií-yu ndaa. ¹⁶Chi Xítohó Jesucristú quee túu-gá andiu, te cana-gá nchaa ñáyiú ní sàndáá iní tnúhu-gá, te òré-áⁿ Yá Ndiöxí cada-gá te òré-áⁿ, cáháⁿ ìⁿ cútú te òré-ni-áⁿ ndoto nchaa ñáyiú ní xíhí, ñáyiú ní sàndáá iní tnúhu-gá. ¹⁷Te dàtnùni nchaa nchoo ñáyiú xñdecu vívú ñuyíú-a naníhí tnáhá-ó ndìhí-yu, te ndanchita-o ndìhu-o xití vící naníhí tnáhá-ó ndìhi Xítohó Jesucristú, te candeca ñaha-gã xii-o ndaa andiu cundecu ndìhi-o-gá ni caa ni quíhíⁿ. ¹⁸Núu xíáⁿ chí cuãha tnàha tnúhu ndee ìní, te vá ndìhú iní-ndó chi naníhí tãhú-ndó nùú-gã.

5 ¹Te nchòhó ñáyiú ndècu ndìhi-í ichi Xítohó Jesucristú ñá túú-gã xíní ñùhu-xi sá càchí tnúhu-í xii-ndo sã quíxí tùcu-gá, te ni ñà túú-gã xíní ñùhu-xi sá càchí tnúhu-í xii-ndo ñàsa cada-xi òré quixi-gá. ²Chi nchòhó sa ñàha ndáá-ndó sã Xítohó Jesucristú quixi-gá nduu ñà túú yìhi iní-ó, chi dàtná quidé ìⁿ ñadúhú cada-gá òré quixi-gá, chi nduu ñà túú ñà yíhí iní-ó quixi tucu-gá. ³Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñà túú-gã ná cúmãní xii-o”, duha quesàhá-yu. Te ñáyiú-áⁿ òré ñà túú ñà yíhí ìní-yu, te quèxio tnúndòho tnúhu ndàhú sá cúu-xí-yu. Chi cada-xi dàtná quidé-xí ìⁿ ñáyiú dìhí ní tnahá òré cacu déhe-xi, chi na iní-yu ní dátñhú ñáhá-xí te vá cãcu-yu núú tnúndòhó-yu, te ducaⁿ sã tnàhá-xi yáha nchaa ñáyiú ñà túú ndècu ichi-gá, chi na iní-yu quexio tnúndòho sá cúu-xí-yu te vá cãcu-yu núú tnúndòho-áⁿ. ⁴Te nchòhó ñáyiú ndècu ndìhi-í ichi Xítohó Jesucristú, ñà túú-gã ndécú-ndó ìchi cuehé ichi duha, núu xíáⁿ sa yìhi-ná iní-ndó nduu quixi-gá te vá yáha-ndo dàtná yáha nchaa ñáyiú ñà túú ndècu ichi-gá, chi ñáyiú-áⁿ ñà túú ñà yíhí ìní-yu sá quíxí-gã. Te na iní-yu quexio-gá dàtná quidé ñadúhú na iní-ó quíhu-güedé vehe-o dùhu-güedé ducaⁿ càda-gá òré quixi-gá. ⁵Te nchoo ñà túú-gã ndécú-ó ìchi cuehé ichi duha, te ichi-áⁿ cúu-xí dàtná ìⁿ ichi nee ndècu-o ni cuu, te vitna sa ní ngúndecu-o ìchi váha, te ducaⁿ chi Yá Ndiöxí ní dándíxí tũu-gá iní-ó cuendá cutnùní iní-ó nàcuáa nduu cuendá-gá. ⁶Te xini ñuhu-xi dandixi túu-o ìní-ó, te cada váha-o cundecu-o ichi-gá, te vá cáda-ó dàtná quidé nchaa ñáyiú ñà túú sàndáá iní ñáhá xii-gá, chi ñáyiú-áⁿ ñà túú-gã quidé cuendá-yu te núu

quide váha-yu àdi ñá túú quide váha-yu ndècú-yu. ⁷Te nchaa ñáyiú quide cuehé quidé dùha cuú-yu dàtná ìíⁿ ñáyiú xidí àdi xíni, chi ñá túú quide cuendá-yu nàcuáa cada-yu ìíⁿ sá vâha dàtná cuení Yă Ndiöxí. ⁸Te nchòhó ñáyiú sa ní cutnùní iní-xi nàcuáa ndùu ichi váha, dandixi túu-ndo ìní-ndó cùndecu-ndo, te quindáá ndisa iní-ndó Yă Ndiöxí, te cuu iní-ndó cuè tnaha ñáyiú-ndo te ducaⁿ te vá táxi tnùní ñáhá nì ìíⁿ sá cuèhé sá dúhá xii-ndo. Te ío cuhuⁿ iní-ndó sã cùndècu-ndo ndìhi-gá ni caa ni quíhíⁿ. ⁹Chi Yá Ndiöxí ní cachí-gá sá vâ quíhíⁿ-ó nùú ùhú núú ndàhú, chi mee-gă nacuaca ñaha-gă xii-o cùndecu-o ndìhi-gá, chi ní sándáá iní-ó Xítohó Jesucristú. ¹⁰Te mee Xítohó Jesucristú ní xíhí-gá sá cuèndá nchaa yícá cuèchi-o, te ní ndoto-gá cuèndá nduu táhú-ó cùndecu-o ndìhi-gá andiú na sàá nduu cuèi sa ní xíhí-ó, àdi vátá cùú-gá-ó. ¹¹Núú xíáⁿ chí cuăha tnàha tnúhu ndee ìní, te chindee tnàha-ndo cundecu-ndo ichi-gá dàtná tá quide-ndo véxi.

Té Păblú dáquini sàhú-dé ñáyiú ndècu ichi Xítohó Jesucristú

¹²Te nchòhó ñáyiú ndècu ndìhi-ndí ichi Xítohó Jesucristú, càháⁿ ndàhú-ndí núú-ndó sã cánèhe-ndo sá yíñùhu núú cuè téè cùnūu xinu cuechi núú Yă Ndiöxí, cue téè dānehé ñáhá xii-ndo nacuáa cundecu-ndo ìchi-gá. ¹³Te cáháⁿ váha-ndo ndìhi-güedé, te cuu iní-ndó-güedě, chi nàha-ndo sá chíúⁿ Yă Ndiöxí quidé-güedě. Te cundecu ndìhi váha tnàha-ndo nchaa-ndo.

¹⁴Te càháⁿ ndàhú tucu-ndí núú-ndó sã cáháⁿ-ndó dōho nchaa ñáyiú ñá túú cuení cada chiúⁿ, te ducaⁿ cuăñaha-ndo tnúhu ndee ìní xii nchaa ñáyiú quèyuhu iní-xi canchicúⁿ nihnu ichi-gá, te chindee tùcu-ndo nchaa ñáyiú vátá ngūnu ichi váha-gá, te cunduu càhnu iní-ndó nūū-yu ncháá-yu.

¹⁵Te cada ndee ìní-ndó te núú ndècu tnaha ñáyiú-ndo cùu úhú iní ñáhă-yu xii-ndo, te vá tnàhá-ni-ndo cùu úhú iní-ndō-yu. Te mee-ni sã vâha cada-ndo sã cúú-xí nchàa tnaha ñáyiú-ndo.

¹⁶Te nchaa nduu ío cudíí ìní-ndó cùndecu-ndo. ¹⁷Te ìíⁿ nduu ìíⁿ nduu cáháⁿ ndìhi-ndo Yă Ndiöxí. ¹⁸Te ndacáⁿ táhú-ndó nūú-gă te núú nāndi cùu sá yăha-ndo ndècu-ndo, chi ducaⁿ cuení-gá cada-o, te diu ducaⁿ ndùu tnúhu càháⁿ Xítohó Jesucristú.

¹⁹Te vá quèhndé nihnu-ndo chiúⁿ quide Espiritú Yă Ndiöxí iní-ndó. ²⁰Te vá cádá sàá iní-ndó nūú cuè téè càháⁿ tnúhu Yá Ndiöxí nàcuáa dàcahu iní ñáhá-gă xii-güedé. ²¹Te cada cuèndá váha-ndo nàcuáa càháⁿ-güedé, te tnii-ndo nchàa tnúhu váha càháⁿ-güedé. ²²Te dañā-ndo nchàa ichi cuehé ichi duha.

²³Te mee Yă Ndiöxí quidé-gă ío váha cùu iní-ó ndècu-o ichi-gá. Te xicáⁿ táhù-í núú-gă sá ná càda íí ñáhá-gă xii-ndo, te na còto ñaha-gă xii-ndo ndìhi iní-ndó cuèndá sá vâ cádá-gă-ndó nì ìíⁿ sá cuèhé sá dúhá, te diu-ni

1 TESALONICENSES 5

ducaⁿ na càda-gá sá cúú-xí-ndó nděé ná sàá nduu quìxi tucu Xítóhó Jesucrìstú ñuyíú-a. ²⁴Chi Yá Ndiöxí Yaá ní cáháⁿ ñáhá xii-o cada-gá nàcuáa ní cáháⁿ-gá, te chindee ñàha-gá xii-ndo.

Té Păblú quidé ndèe iní-dé ñáyiú xĩndecu ichi Xítóhó Jesucrìstú ndécú ñùú Tesalónica

²⁵Te nchòhó ñáyiú ndècu ndihí-í ichi Xítóhó Jesucrìstú, cácaⁿ táhú-ndó nùú Yă Ndiöxí sá ná chindee ñaha-gá xii-ndí.

²⁶Te cúñaha-ndo xii nchaa ñáyiú ndècu ndihí-o ichi Xítóhó Jesucrìstú sá nì yuhu nì iní-ndí quidé ndèe iní ñáhá-ndě xii-ndo ndihí-yu.

²⁷Te vitna mee Yă Ndiöxí ndéhé-gă sá cáháⁿ ndàhú-í núú-ndó să dăcuàha-ndo tutú-a núú nchàa ñáyiú ndècu ndihí-o ichi-gá.

²⁸Te Xítóhó Jesucrìstú ío na chindee chitúu ñaha-gă xii-ndo nùú cuàháⁿ núú vëxi. Te ducaⁿ na cùnduu. Te ío chí cádá ndèe iní-nă vitna.